

# A Ezio Bortolussi

MARCO PETTI

Autoritâts, sioris e siôrs, coleghis, Ezio Bortolussi, un salût di bande mê, tant che Diretôr dal Dipartiment Politecnic di Inzegnarie e Architeture, che al à promovût e proponût al Senât academic de Universitât dal Friûl il conferiment de lauree honoris causa a Ezio Bortolussi.

La solecitazion, vignude dal teritori (dal montesterni), e je stade valutade cun atenzion dal Consei dal gno Dipartiment che le à aprovade e trasmetude al Senât Academic ai 13 di Jugn dal 2018. Il Senât Academic, ai 24 di Lui dal 2018, al à confermât ae unanimitât la richieste e le à trasmetude al Ministeri de Istruzion, de Universitât e de Ricerche.

La procedure di aprovazion e vûl, te fase preliminâr, che e sedi nomenade une comission di valutazion formade di docents che no fasedin part de Universitât di Udin e chest compit al è stât dât al Prof. Claudio Amadio, professôr ordenari di Tecniche des Costruions te Universitât dai Studis di Triest, al Prof. Fabrizio Vestroni, professôr ordenari di Sience des Costruions te Universitât “La Sapienza” di Rome e al Prof. Carmelo Gentile, professôr ordenari di Tecniche des Costruions tal Politecnic di Milan.

La Comission e à esprimût un parê favorevul unanim ae propueste di Lauree Honoris Causa in Inzegnarie Civîl, cun motivazions che o ai gust di condividi cun ducj voaltris e cul laureant.

Te sô relazion il prof. Amadio al ricuarde cemût che la ativitât di Bortolussi “tal ambit des costruions di beton armât di grande altece e je risultade propit chê di un inzegnâr une vore cualificât tes operazions di cantîrs caraterizâts cun alte cualificazion e complessitât. A ‘nt son prove lis tantis inovazions puartadis tal ambit des costruions rampantis

e de otimizazion di cantîr par edificis di grande altece. Inovazions che a àn permetût di realizâ oparis cetant preseadis in Canadà e in altris parts dal mont”.

Il prof. Vestroni al evidenzie cemût che “ogni progjet al presente problematichis propriis, frontadis cun strategiis specifichis, cjatant simpri soluzions inovativis, ançe cun risultâts estetics di cualitât. I aspiets che a àn contribuît al sucès di chestis ativitâts a son stadis soluzions che a àn privilegjât i timps di realizazion, i coscj e i requisîts di sigurece”. E al continue, “Bortolussi al è il classic câs di un om che al à mostrât dotis no comunis, no dome di iniziative, ma ançe di competence tecniche de Inzegnarie Civîl, che a àn rindût vincentis lis modalitâts di realizazion di costruzions complessis, come che a son i gratecî, soledut cuant che a son fats sù in contescj urbans dificiî”.

Il prof. Gentile te sô relazion al scrîf “Bortolussi al è un paradigme perfet dal Inzegnâr di cantîr che, cu la esperience e la culture tecniche e tecnologjiche, al à savût creâ une ‘gnose vie’ viers lis grandis realizazions metint insiem passion, fantasie e ricercje di soluzions tecnologjichis inovativis, tal rispiet dai vincui impuartants che la costruzion di ogni edifici alt e imponent”. Tant che, al siere il prof. Gentile, “Passion pe costruzion, cognossince direte de pratiche dal cantîr, intuizion, culture tecniche e ricercje de inovazion a àn fat di Ezio Bortolussi un interprete straordenari de Inzegnarie Civîl dai nestris timps”.

Chescj judizis a son stâts condividûts e fats propriis dal gno Dipartiment che nol à vût esitancis tal proponi Ezio Bortolussi par une laurea magjistrâl ad honorem.

Tra i tancj cors di laurea ufierts dal Dipartiment, nus à parût naturâl une sô colocazion te Lauree Magjistrâl in Inzegnarie Civîl.

Di bande mê, une laude particolâr al Siôr Bortolussi, braûre dal popul Furlan e model pai nestris students.

*Marco Petti*  
Diretôr dal Dipartiment Politecnic  
di Inzegnarie e Architeture  
Universitât di Udin